

Club di futbol Sport Club United a bira un realidad



ORANJESTAD - Diahuebs anochi, nos a cera conoci cu un club di futbol nobo procedente di e bario di Noord, esta Sport Club United. E club di futbol SC United anteriormente a hunga bou di e nomber di Jong Aruba y awor a dicidi di lanta nan mesun organisacion unda lo milita den e division infantil di LIFIDA como tambe den e Liga Hubenil di AVB. Den un Parke Arawa completamente yen, presidente di SC United, Sr. Richard Peasch a dirigi su mes na e hungadonan y e mayornan unda el a bisa

di ta masha contento cu SC United a bira un realidad. E no tabata un trabou facil, pero mirando e ayudo ricibi di un y tur a lo largo a yuda cu e club por yega na por ehempel e uniform nobo cu a bini for di Peru. E ta spera di por sigui ricibi sosten di e miembronan y mas cu claro tambe di e patrocinadonan cu ta kere den e organisacion di SC United.

Despues cu algun miembro di directiva y coachnan a hiba palabra a bay over na batisa e uniform nobo. Esaki a ser efectua pa e dos madrinan-

an di e ekipo cu ta Giannina Croes y Kiandra Lopez. E uniform ta uno moderno y masha bunita mes.

E logo di SC United ta cora, blanco y preto cu e U simbolizando United y a ser diseña pa Style Publicity. Por ultimo tabata tin algun snacks y algo di bebe pa tur presente. Manera a ser bisa cu SC United ta un ekipo competitivo sigur e ultimo temporada tras di lomba unda a hunga bou di e nomber bieu esta Jong Aruba. Pues ta spera cu cosnan grandi lo por ser logra den e temporada binidero. □

